

四庫全書

史部

欽定四庫全書

東都事略卷一百二十四 宋 王 稱 撰

附錄二

延禧號天祚皇帝改元曰乾統女真有俊禽曰海東青
次曰玉爪駿俊異絕倫一飛千里非鷹鷂鷃鵲之比延
禧縱弛失道荒於畋獵喜此二禽善捕天鵝命女真國
人過海詣深山窮谷搜取以獻國人厭苦遂叛政和元
年延禧改元曰天慶遣內侍童貫為國信使遼之君臣

相聚指笑曰大宋乏人材如此遣一腐夫為奉使官何邪貫回至盧溝河有燕人馬植者北朝大族也行汚而內亂燕人不齒乃夜見童貫侍者自陳有滅燕之策貫召見大奇之因擁以歸易姓名曰李良嗣薦之於朝浸加顯擢又賜姓趙氏是時遼人與女真交兵已四五年良嗣獻策曰女真恨遼人切齒又其主天祚淫荒失道本朝若遣使自登萊州涉海結好於女真不一月可到與之相約夾攻遼國則其國可圖也議者以謂自祖宗

以來雖有此海道然以其地邊接諸蕃禁商旅舟船不許通行幾二百年矣恐夷人窺伺中國也貫不聽乃遣登州都巡檢馬政與良嗣往使女真約夾攻遼國馬政本熙河人其子擴應武舉有口辨令隨父使女真相約滅遼國之後中分其地會大臣有力爭者遂已宣和三年延禧改元曰保大四年延禧悉國中兵與女真大戰而大敗遂陷上京東京延禧徙燕京女真又以精兵攻之延禧哀殘衆與之接戰復大敗與其子趙王梁王遂

奔於北界不毛之地由漢陽嶺入夾山初延禧留宰相
張琳李處溫與秦晉國王溥守燕延禧入夾山國人無
主處溫與其國人謀立溥溥延禧叔也宗真之孫洪基
之妹初洪基囚其子溥欲立溥為儲貳不果已而立延
禧溥守燕十二年人號燕王又謂之覃湘大王處溫等
帥薊京數萬人入燕王府勸進唯張琳有難色曰居攝
可矣何必為真處溫曰天意人心如此尚可易邪溥出
遽以赭衣被之遂即位以處溫守太尉左企弓守司徒

曹義勇知樞密院虞仲文參知政事張琳守太師十日
一朝平章軍國大事雖外以元老尊之實處溫不欲其
在上也淳號天錫皇帝改保大四年為建福元年廢延
禧為湘陰王遼國自此分矣童貫知延禧失國乃請兵
北伐徽宗以貫為河北河東宣撫使引兵北向徽宗以
三策付貫如燕人悅而從之因以復舊疆上也如耶律
淳納土稱蕃中也如燕民未即悅服按民巡邊全師而
還下也貫用劉幹字文黃中為參謀程唐王序為轉運

使而掌行文書者李宗振也宗振本曹州刀筆之吏姦滑而善舞文自陝西開邊貫倚為腹心貫雖有文士為幕屬而裁決機務一委宗振貫又起兵於陝西引种師道為都統制師道宿將也以此舉為非而貫不聽貫聚兵於雄州以五月中旬命种師道與知雄州和訕兵五萬屯於白溝渚遣蕭幹引精兵二萬及常勝軍迎敵幹本奚人蕃名古爾班常統遼國渤海奚人漢人四色軍馬號四軍大王幹引軍擣師道右軍右軍潰又犯左軍

左軍驚擾師道遣楊可世率驍銳五千人過橋北擊遼
之中軍遼軍乃回而楊可世身被重創師道軍已沮遂
引軍夜遁遂明蕭幹以騎兵五千尾擊之師道與詵度
河而走徽宗以燕薊未可下乃詔班師淳以書責貫輒
敗祖宗信誓於盛夏之日舉無名之師已為吾擊退今
欲如何貫不能對會淳已病延禧自夾山傳檄天德雲
內等州會諸蕃五萬騎約以八月入燕李處溫蕭幹等
議曰莫若迎秦拒湘湘者延禧而秦者延禧次子也令

百官從吾議者東立獨南面行營都統耶律寧趨西處
溫問其故對曰若天祚果能興復力足舉燕是天數何
以拒之如其不然秦湘父子也今迎子而拒父豈理也
哉處溫奏曰寧搖衆請誅之淳撫几歎曰此忠臣也豈
可殺之天祚果能來吾有死而已將何辭以相見迺禧
兵出漁陽嶺僅復豐應等州又為女真所敗其元妃諸
王皆被虜再奔夾山淳疾亟乃授李處溫蕃漢馬步軍
都元帥欲以後事託之蕭幹達實林牙等言處溫恃翊

戴之功輕侮僚屬若今授此職吾輩得以安乎乃矯詔召宰相左企弓曹勇義虞仲文康公弼等以侍病為名共議此事獨處溫不至而處溫陰聚武勇二千人從間道乞王師為援是夕溥卒秘不發喪蕭幹會百官於球塲議宣言曰今上無嗣欲立皇后蕭氏權主軍國事奉迎天祚次子秦王為帝從吾議者書之羣臣無敢異者蕭后遂即位改建福元年為德興元年蕭后者溥妻秦晉國妃也以幹有援立功封為越王乃召處溫欲斬之

處溫來后以時方多艱不欲誅大臣但毀其元帥宣劄而已延禧聞淳死下詔奪其官封妻蕭氏降為庶人貫聞淳死耻兵敗思立功以報天子謂遼國既無主有間可乘復自莫州回雄州奏乞益兵王黼為太宰力主再興師之議為貫大發陝西將兵及廊延路副總管劉延慶赴貫戲下期九月會於三關貫與蔡攸謀再舉會女真已破雲中府扣居庸關勢已盛改號大金國乃移文於貫詰問元約夾攻遼國何為背約不進兵貫恐懼遂

定議大舉常勝軍首領郭藥師叛以涿州來降易州聞
涿州降亦降蕭幹聞王師再壓境自燕來涿州藥師疑
幹圖已使人諭之幹怒曰吾嘗薦爾於朝豈可背邪藥
師乃不敢加害幹亦慮禍及身遽起啟鑰而去幹見蕭
后俯伏待罪蕭后曰卿與諸將早為措置收復涿易多
方招誘善之善也蕭后既失涿易州又聞貫攸益兵欲
與金人夾攻燕薊知不能立國乃遣使韓昉齎表詣貫
以降願稱臣稱貢貫攸不納昉謂貫攸曰女真人素性

強悍樂于戰爭豈可與之為隣他日必悔大朝不要錯
貫攸叱回遂以十月進兵命劉延慶為都統制統兵十
萬自白溝入界令郭藥師為選鋒延慶行至良鄉蕭幹
率萬人迎擊延慶與戰不利遣大將高世宣與藥師入
燕山蕭幹留精兵三千人在城中與藥師巷戰藥師敗
走世宣死之藥師徑走涿州延慶聞敗亦棄大將旗鼓
而走是歲金國主阿固達以銳兵入居庸關晡時至燕
京蕭后間居庸關失守夜率蕭幹等并老幼出城聲言

迎敵實出奔也蕭后欲歸我以求全未果而金國遊騎已至城下統軍蕭乞信開啟夏門納金人於是左企弓虞仲文曹勇義劉彥宗并蕭乞信等皆降蕭后奔松亭關與大臣共議所向達實林牙遼人也欲歸天祚蕭幹奚人也欲歸奚王府立國有蕭博迪者溥之婿也曰今日固合歸天祚然胡顏見之達實林牙怒曰爾敢異議邪即斬之令軍中曰此不欲歸天祚者於是遼人與奚人列陳而分遼軍從蕭后與達實林牙趨夾山歸延禧

延禧斬蕭后而赦達實林牙奚人與渤海軍從蕭幹留
奚王府遂僭號大奚國稱神聖皇帝改元曰天嗣阿固
達死童貫蔡攸帥師入燕撫定奚人嘉勒幹領衆出盧龍
嶺攻陷薊州寇掠燕城王安中為燕山宣撫使命郭藥
師領兵破之大戰於峯山獲耶律德光尊號寶檢契丹
塗金印幹既大敗奚渤海軍皆失其家歸怨於幹其部
伯特赫殺之傳首京師時宣和六年也延禧得達實林
牙七千餘騎又陰結韃靼毛褐室韋三萬騎助之延禧

謂中興有日欲搗山後之虛復燕雲地林牙諫曰不可
自車駕奔夾山不能一戰今舉國為金人所有乃欲嬰
其鋒非計也不如蓄銳待時無輕舉延禧不聽林牙稱
疾不行延禧彊率諸軍出夾山越漁陽嶺取天德軍東
勝寧邊雲內等州南侵武州遇金人烏舍軍烏舍帥山
西漢兒鄉兵為前驅以女真千餘騎伏山間乃出韃靼
等顧之大駭而潰烏舍遣羅索貝勒領五百騎擊之延
禧跳身投夏國未至伏發烏舍下馬踞於延禧前曰奴

婢不佞乃以介冑犯皇帝天威死有餘罪因奉觴而建
遂為烏舍所擒削封海瀕王送長白山東築城居之後
踰年而卒遼國自安巴堅并業德光恢廓疆宇其後併
吞諸蕃割據漢界南北五千里東西四千里子孫相繼
二百餘年嘗與中國抗衡會無一日秋毫之警至延禧
失道金人稱兵首尾攻戰十有六年卒以亡國云

臣稱曰昔尹洙之叙燕曰戰國世燕最弱二漢叛臣恃
燕挾敵蔑能自固以伯主之強卒制於袁氏獨慕容乘

石虎亂乃并趙雖勝敗異術大槩論其強弱燕不能加
趙魏趙魏一則燕固不敵唐三盜連衡百餘年敵未嘗
越燕侵趙魏是燕獨能支敵也自燕覆於敵敵日熾大
顯德世雖復三關尚未盡燕南地國初敵與并合勢益
張然止命偏師備禦王師伐蜀伐夏秦然不以兩河為
顧是趙魏足以制敵明矣并寇既平悉天下銳專力於
敵不能擾尺寸地嘗以百萬衆駐趙魏訖敵退莫敢抗
世多咎其不戰然我衆負城有內顧心戰不必勝則事

亟矣故不戰未當咎也原其弊在兵不分設兵分為三
壁於爭地犄角以疑其勢設覆以待其進邊壘素固驅
民以守之俾其兵頓堅城之下乘間夾擊無不勝矣蓋
兵不分有六弊使敵蓄勇以待戰無他楮梧一也我衆
則士怠二也前世有善將兵者必問才智能否將幾何今
以中材畫主之三也大衆儻北彼遂長驅無復顧忌四
也重兵一屬根本虛弱纖人易以干說五也委大柄不
無疑惑復命貴臣監督進退皆由中御失于應變六也

兵分則盡易其弊是其六利也且勝敗兵家常勢悉內以擊外失則舉所有以棄之符堅肥水哥舒潼關是也則制在謀不在衆矣以趙魏燕南益以山西民足以守兵足以戰分而帥之將得專制就使偏師挫衄他衆尚奮詎能繫國家安危哉師覆於外而根本不搖者善敗也昔者六國有地千里師敗於秦散而復振幾百戰猶未及其鄙守國之固也陳勝項梁舉關東之衆朝敗而夕滅新造之勢也以天下之廣謀其國不若千里之固

而襲新造之勢傲幸於一戰庸非惑哉今兵久弛士大夫誦聖言謂百世不復用非妄也然兵果廢則已設後世復用之鑒此少以悟世主故迹其勝敗焉李清臣亦有言臣使雲中道詠幽媯蔚愛其形勝每私自歎息恨其為敵國有自石晉以十六州賂契丹凡漢唐所以御敵國者反為彼用非契丹實強中國亂也我失其地而累朝不能復以天下之大而粟焉嘗憂寇盜之至非特人謀弱亦地形然也烏虜真宗以禮幣結隆緒仁宗以

信義懷宗真聖人一視同仁兼愛南北蓋如此至延禧
立乃畋游無度虐用其衆喜海東青以搏天鵝好樂無
厭遂以覆國書曰內作色荒外作禽荒其延禧之謂與

東都事略卷一百二十四

欽定四庫全書

東都事略卷一百二十五 宋王稱撰

附錄三

金國女真也其地即肅慎氏之國東漢謂之挹婁元魏謂之勿吉隋唐謂之靺鞨文帝因宴勞之使者及其徒起舞於前曲折皆為戰鬪之狀文帝謂侍臣曰天地間乃有此物常作用兵意其屬分六部有黑水部即今之女真其水掬之則色微黑契丹目為混同江唐太宗征

高麗靺鞨佐之戰甚力駐蹕之敗高延壽高惠真以其衆及靺鞨兵十餘萬來降太宗悉縱之獨阮靺鞨三千人開元中其酋來朝拜為勃利州刺史遂置黑水府以部長為都督刺史賜府都督姓李氏唐世朝獻不絕五代時始稱女真後唐明宗時嘗侵登州渤海擊走之其後避契丹諱更為女直居混同江之南者謂之熟女真以其服屬契丹也江之北為生女真亦臣於契丹本朝祖宗時亦屢遣使來朝遼主廼禧立建中靖國元年也

歲使人須索於女真又求海東青者名禽也小而俊健
女真不堪命其酋阿固達貌雄偉有大志欲叛未有以
發遼國天慶元年時政和元年也其二年延禧漁于混
同江女真以故事來會延禧以阿固達顧視不常密欲
誅之樞密使蕭奉先不可遂止阿固達亦知之四年遂
舉兵叛以其弟烏奇邁尼堪烏舍等為謀主尼楚赫伊
里羅宿棟摩等為將延禧屢出師東討至則陷沒或不
戰而遁棄甲遺戈繇亘百餘里女真收以為用遂有輕

遼國心明年遂取黃龍府延禧舉國親征女真大懼阿
固達以刀脅面仰天大哭謂其衆曰始與女曹苦遼國
殘擾共謀起兵欲自立國爾今天祚親至將盡翦我曹
非人人死戰無生理勢必不敵不若殺我以降諸酋皆
拜曰事至此當誓死一戰乃與延禧遇乘其未陳三面
爭擊之延禧大敗僅以身免一日一夜馳五百里女真
乘勝遂併渤海遼陽所管州郡五十四延禧遣其叔秦
晉國王淳率蕃漢十餘萬衆圖復遼陽募遼陽飢民以

戰謂之淵軍會其將作亂遁去餘軍皆潰自是女真取其川成淳懿乾顯六州將趨中京始有併吞遼國之意遼東人有楊朴者勸阿固達稱皇帝以其國產金號大金國建元為天輔是歲政和八年也先是建隆以來女真由遼東蘇州泛海至登州買馬故道猶存有高藥師者以大舟泛海來具言女真攻遼國奪其地事知登州王師中以間詔蔡京童貫遣人伺其實委師中選將校七人同高藥師過海見女真還者不敢前復廻青州知

青州崔直躬奏其事詔復委童貫措置已而遣武義大夫馬政與平海軍卒長呼慶仍與高藥師過海為邏者執縛送女真尼堪烏舍詰問其由政以實對遂遣李善慶等同政等回明年善慶等至京師徽宗令蔡京童貫見之議事差歸朝官趙有開及馬政王師中之子瓌充使與李善慶等度海聘之至登州有開死未征會河北謀者言遼國與女真脩好於是罷遣使者止差呼慶同善慶等歸宣和二年呼慶至自女真持其書來云遼國脩

好不成請別遣人脩好朝廷遂欲倚之復燕以歸朝官
右文殿脩撰趙良嗣充使忠訓郎王瓌副之由登州海
道用故事買馬為名因與之約契丹若亡取燕雲舊地
時女真已出師趨上京良嗣會阿固達於青牛山徑攻
上京破之良嗣遂與約同入燕京取燕雲地阿固達曰
燕京本漢地當與南朝遂議歲賜如契丹舊數遣良嗣
等回約來年同舉差錫喇赫嚕為使大迪烏高隨為副
持其國書來良嗣等同使人至京師見於崇政殿既辭

遣武義大夫馬政隨赫魯報聘再議雲中地復遣赫魯
同馬政來先是童貫以趙良嗣上京之約遂欲舉兵應
之會盜起睦州貫以西兵討賊未果赫魯至京師徽宗
諭館伴權邦彥以遼人已知金人海上之約難以復如
前議邦彥慮失其權言不可止以國書付赫魯遣呼慶
送之阿固達得書意朝廷絕之乃悉師度遼而西陷中
屯白水延禧奔夾山女真遂招降雲中朔應等州宰相
張琳等立燕王溥廢延禧為湘陰王遣使來徽宗曰天

祚在夾山燕王何以得立却其使時金兵已到山後平定州縣朝廷遂遣童貫為陝西河東河北宣撫使勒兵十五萬巡邊時宣和四年也貫至高陽關奏言昨女真下中京余覩徃雲中契丹分力檣梧我乘機會進兵收復諸事省力既失此便以為後時復遣蔡攸為副使攸至河北乃辭詔曰朕以童貫昏繆將佐守帥皆其門人故舊相與隱蔽致邊事差失故欲監軍耳貫又奏臣見河朔將兵驕惰軍須關乏糧食腐敗軍器守禦之物悉

皆無備慮失事機詔河北漕臣中山真定高陽關路帥臣究心辦集已差將兵疾速前去違詔並寘軍法於是西師畢集劉延慶節制諸軍劉韜字文黃中為參謀貫至雄州令趙良嗣草書遣歸朝官張寶趙忠諭淳禍福淳得書執二人斬之貫知游說不效乃募馬擴自雄州齎書入燕招諭耶律淳遣王介儒王仲孫同馬擴來問兵端擴答以朝廷命將出師之議非羣下所盡知但略聞北朝先入燕遣馬擴歸獻捷良嗣等至金人軍前阿

固達欲燕京稅租而不議平灤等州再遣李靖王度刺
來議其事且欲交歲幣朝廷復遣趙良嗣周武仲同議
租賦多寡之數阿固達欲得百萬緡良嗣徃復辨論未
決遣良嗣歸良嗣至雄州以驛書聞詔許之亦許交歲
幣再遣良嗣至軍前阿固達大喜遂議雲中地阿固達
云我增百萬緡南朝一言不辭今求西京何辭拒之遂
遣尼楚赫圖喇色埒默齋誓草來差盧益趙良嗣馬擴
報聘烏舍云計議已定近有燕京職官趙溫訊李處能

王碩儒韓昉等來南須先以見還可議交燕月日良嗣
諭宣撫司以趙溫訊等與之乃得其誓書以檀順泳易
燕薊六州來歸燕之金帛子女職官人民皆席卷而東
朝廷捐金帛數百萬計所得者空城而已於時議者以
六州之地無險阻可守不曾分立界至歲輸之物有自
二廣江湖宛轉運至京師自京師運至河北自河北運
入燕自燕運至薊州界首韓城鎮交割僅萬里必不能
以時至天下之禍自此起矣既交燕畢阿固達出居庸

關由雲中府德州路西巡留白水灤度夏阿固達中病死尼堪幹里雅布等遙尊烏奇邁為帝改元曰天會謚阿固達曰大聖武元皇帝廟號太祖童貫蔡攸帥師入燕號撫定勒碑於延壽寺以紀功將佐姓名皆列於碑留十日乃回以詹度知燕山府又以王安中為宣撫使駐燕山閱數月改蔡靖知燕山府又留郭藥師麾下常勝軍三萬人在燕藥師出於降虜素有輕中國心乃增置常勝軍萬餘人多買戰馬陰為偏伯之計貫攸在雄州

不能裁制凡常勝軍計口給錢糧月費米三十萬石錢一百萬緡河北之民力不能給朝廷下諸路起免夫錢六百二十萬億以助之天下於是民力竭矣方是時燕人張覺仕遼為遼興軍節度使守平州不肯降金人仍稱保大五年畫延禧象朝夕朝謁事無大小告而後行遂發兵以拒金人金人既滅遼國遣其宰相左企弓等部所起燕山職官富戶東取榆關平灤路以歸燕山憚遠遷列訴於覺覺召左企弓等數其不能輔佐天祚之

罪殺之縱燕人自便諭燕人令安堵如故應田宅為常
勝軍占者悉還之燕人既得歸皆大悅徃徃南來至京
師徽宗聞之詔詹度令選有材智忠信之人密諭覺許
其世襲又令率衆內附覺亦遣其黨張興祐詣度度以
徽宗意語之覺大喜遣其屬張鈞詣宣撫司納土有燕
人李安弼謂王安中曰平州形勝之地張覺綜練之才
足以禦金人安燕境幸招致之毋令西迎天祚北合蕭
幹為吾患安中入其語勸朝廷納之令安弼齎書詣闕

趙良嗣不可曰如此豈不招女真之兵邪因乞斬安弼以徇朝廷不從遂拜覺泰寧軍節度使使世襲平州金人大怒悉兵以攻覺時貫攸還京師亦盛稱覺之材武可以捍金人乃以金華紙賜詔書與覺使之擊金人金人邈得之盛怒曰南朝敗契丹百餘年信誓方與我結好吾又與六州之地不數月復與張覺相約攻我豈可但已遂襲破平州覺挺身走燕山金人來取覺朝廷不得已令王安中函覺首以送金人久謀敗盟至是舉師

韓里雅布寇燕山郭藥師率麾下兵四萬又起涿易等州兵三萬戰於潞縣藥師大敗引數騎走至燕山伏壯士於後園擒守臣蔡靖及兵將官囚之遂降於金人燕山諸郡皆陷吏部員外郎傅察接伴賀正旦使人於玉田縣韓里雅布脅之使降副使蔣噩等羅拜獨察不屈死之尼堪寇河東初宣撫司招燕雲之民置之內地號義勝軍皆山後漢兒也分屯河東尼堪兵至朔武及代州漢兒皆開門迎降遂踰石嶺關分兵圍太原韓里雅布引大

兵自涿州入安肅廣信軍界略真定中山慶源府境至
信德府破之徽宗得警報於是遜位於欽宗

東都事略卷一百二十五

欽定四庫全書

東都事略卷一百二十六 宋 王 稱 撰

附錄四

欽宗既即位金人欲退師郭藥師曰南朝未必有備不如姑行韓里雅布至信德府視城陋甚援枹攻之未幾守陴者立幟城上城中皆降逸而出城者斬之驅守臣楊信功以出金人至邯鄲遣藥師為前驅付以千騎藥師求益復以千騎與之藥師疾馳三百里質明遂至瀋州

內侍梁方平與大將何灌屯兵控扼黃河北岸敵騎奄至倉卒奔潰時南岸守橋者望見敵中旗幟燒斷橋纜陷沒凡數千人敵因得不濟方平既遁何灌軍亦望風潰散我師在河南者無一人乃絞木棧度河靖康元年金人犯京師攻雲澤門次攻通天安泰門李綱分兵擊退朝廷因議請和遣駕部員外郎鄭望之充軍前計議使康州防禦使高世則副之金人亦遣吳孝民與望之相見孝民曰皇子郎君到趙州得皇帝登極赦書以手

加額既是皇帝已即位無可爭者却與他講和休皇子
郎君幹里雅布也因言欲割大河為界副以犒軍金帛望
之與辨論之孝民不荅遂與望之由開遠門入至都亭
驛有詔趨問使回所得語意望之等入奏使事欽宗御
崇政殿引見金使吳孝民跪奏曰前日南朝與大金結
約海上復違盟誓皆已往事今日少帝陛下與大金別
立誓書結萬世驩好可也皇子幹里雅布遣使人代朝見
之禮願遣親王宰相到軍前報禮大金喜禮意之重前

日割地之議往往可罷少帝之稱自此始也欽宗命同知樞密院事李銳奉使望之世則副之金人需金五百萬兩銀五十萬兩牛馬萬匹采緞百萬割太原中山河間三路之地以大河為界并欲宰相親王一人為質乃遣少宰張邦昌及康王出質於敵營金人索金帛犒軍欽宗下詔勸忠義之家令助金帛又權借士庶家應副見在今帛猶未足遂權行根括民庶金銀赴官統制姚平仲引兵出城與金人戰敗績尋遣宇文虛中等奉地

圖割三鎮以和金人退師質肅王以行先是金人不愛
康王也復令入城至是遂以肅王行斡里雅布雖已退師
而尼堪之師陷隆德府欽宗與金人講和許割三鎮二
十州及遺金帛若退師之日不許劫掠攻取州縣而金
人所過無不剽取又攻陷我隆德欽宗怒罷黜元主和
議臣僚令种師道姚古种師中往援三鎮復取隆德又
取威勝軍姚古與尼堪戰於南關我師敗績退保隆德
欽宗決策北征种師中兵至壽陽與金人戰死於陳姚

古种師道既敗欽宗遣王雲使金人金人陷太原欽宗
令中書議三鎮等稅租復遣馮澥徃使趨雲徃燕山見
幹里雅布再議三鎮二十州事如此理可折即與稅租不
獲已則依城下之盟羅索陷汾州尼堪陷威勝軍又陷
隆德府幹里雅布陷真定府平陽居民以城降尼堪兵至
澤州城下攻取之幹里雅布遣王雲回京師云如十四日
會於磁相間我軍方不度河馮澥亦來自河北具言幹
里雅布索冕輅等朝廷從之欽宗以康王使幹里雅布軍前

議和止師以王雲為副尼堪陷懷州斡里雅布自大名府由魏縣李固度過大河再遣馮澥行至途中遇王雲雲言斡里雅布堅要三鎮二十州解與雲同歸於朝廷具言金人之意大臣議論紛紜不決也再遣雲同康王行金人既度河復以兵犯京師京師戒嚴康王至磁州雲遇害康王參議言耿延禧等請康王回相州金人攻東津宣化二門殿帥王宗濂領牙兵下城與戰敗績金人攻通津善利門甚急復於護龍河疊橋作道時大雪不止

欽宗見金人攻諸門愈急御瑤津亭命使臣秦仔等八人往河北以康王為兵馬大元帥雪日夜不止金人乘雪攻城益急郭京領兵開宣化門出迎敵金兵分布兩翼而進衝京前軍一掃幾盡守禦官吏相繼奔走由是金人登城者踵至揚旗城上衆皆潰散四壁數十萬之衆為之一空徽宗自龍德宮入禁中金人縱火燒南薰宣化通津善利四門燒劫民居火光亘天連夕不滅開封府率衆父老百姓請命於二酋持金帛牛酒以犒三軍

而二酋堅欲道君出郊既而欽宗曰大金和議已定朕以宗廟生靈之故躬往致謝遂擁素騎出南薰門何鼎孫傳陳過庭等從行曹輔張叔夜留守彈壓越三日欽宗還宮金人移文開封府索馬一萬足於是都城之馬空矣金人索軍器又索金帛犒軍取河東河北守臣監司親屬質於軍中以待分割地界了日歸還又取蔡京童貫王黼等二十餘家親屬是時朝廷先拘收戚里權貴豪富之家金帛以犒金人士庶納金帛者紛然金人

須絹一千萬疋朝廷盡撥內藏元豐左藏庫所有如數與之河北積歲貢賦悉令般運及浙絹南絹亦以充數又索監書如蘇軾黃庭堅文集資治通鑑之類皆指名取索幹里雅布遣使持書入城督金帛鴉軍合用金一千萬錠銀二千萬錠繡帛如銀之數不限官私早晚依數應副詔以書揭示士庶云除內藏元豐左藏及龍德寧德兩宮御前皇后閣皇太子宫并臣僚之家已根括外今曉諭權貴之家凡有金銀衣段疋兩以上並行輸納

二年遣何臬使軍中懇告而根括愈急既有詔曰朕出郊見兩元帥議加徽號遂出南薰門金人遣兵百人衛司馬光墳初欽宗幸金營約五日必還至是民以為金銀未足各竭其家所有獻之太學生徐揆以書達二酋請車駕還闕其書曰昔春秋時楚子伐陳欲以為縣申叔時諫曰諸侯之從者曰討有罪也今縣陳貪其富也以討召諸侯而以貪歸之無乃不可乎王曰善哉吾未之聞也乃復封陳後之君子莫不多叔時之善諫今

元帥興師見伐大兵俯臨都城失守社稷幾亡而復存
生靈幾死而幸免此元帥仁德也雖楚子入陳未能遠
過我皇帝兩造轅門議犒軍之資加徽號之請越在草
莽信宿逾邁國中喁喁跂望屬車之塵者屢矣夫生民
無主境內騷然忠義之士食不下咽又聞道路之言以
金銀未足天子未還揆竊惑之蓋金銀之產不在中國
而在於深山窮谷之間四方職貢歲有常數重以去歲
之役增請和之幣獻犒軍之資官吏征求及於編戶都

城之內雖有妾婦之飾一器用之微無不輸之於上以
酬退師之恩又兵興已來邦國未寧道路不通富商大
賈絕迹而不造境京師豪民蓄積素厚者悉散而之四
方矣間有從官王畿仰給奉祿者饘粥之外睹無長貲
豈復有金銀之多乎今雖天子蒙塵臣庶效力根括私
藏徧及貧戶恐不足以償拋降之目雖以天子為質猶
無益於事也夫有存社稷活生靈之仁德而乃以金帛
之故質君父是猶愛人子之弟而辱其父祖與不愛奚

擇元帥必不為也昔楚子圍鄭三月克之鄭伯肉袒牽羊以迎左右曰不可許王曰其君能下人必能信用其民矣退三十里而許之平春秋書之後世以為美談願元帥推惻隱之心存終始之惠反其君父班師振旅緩以時月使求之四方然後遣使入獻則國中之人德元帥之仁豈敢弭忘傳曰主憂臣辱主辱臣死揆雖卑賤敢昧死以紓君父之難惟元帥矜之二酋取揆赴軍中詰難揆厲聲抗論為所殺時陰雪不止金人索郊天儀

伏法駕鹵簿冠冕乘輿等物及臺省寺監官吏通事舍
人各有差又索犀象寶玉之屬人擔車載徑往供納者
急如星火於時欽宗幸金營十五日矣金人遽廢趙氏
議立異姓及要道君親王等於是道君皇帝寧德皇后
諸王悉入金營同知樞密院事孫傳等累狀言本朝祖
宗德澤在民未泯及國主新立為大臣所誤以致違盟
失信伏望察傳事狀許其自新降號稱藩復主社稷許
於國主子弟中擇一賢者立之或不欲立道君之子乞

於神宗皇帝二子選擇建立非惟不滅趙氏一族亦使
一國生民蒙被恩澤又狀言本國前日將相是宣和用
事誤國之人自嗣君即位以來所任宰相亦繼以罪罷
將相率皆敗亡之餘其他臣僚碌碌無聞者舉於草澤
之間亦非聞望素著人心不歸誰肯推戴又狀請車駕
還闕不然即乞立監國太子且言若立異姓天下之人
必不服從四方英雄必致雲擾生靈塗炭卒未得安傳
自知此言罪在不赦然念有宋自祖宗以來德澤在人

於今九世天下之人雖匹夫匹婦未忍忘之况傳等世
食君祿方主辱臣死之時上為宗廟下為生靈苟有可
言不敢避死金人怒取傳與張叔夜赴軍前二帝遂北
狩皇后太子親王帝姬宗室宮嬪及駙馬等節次出京
師金人又遣莫儔吳玠移文城中令百官僧道耆老軍
民共議立張邦昌治國事並不得引惹趙氏百官會議
於秘書省獨秦檜論列謂邦昌不足以代趙氏語在邦
昌傳金人怒亦取赴軍前金人再索金銀復行根括極

為峻切殺四壁提舉官梅執禮陳振程知質安扶四人者皆侍從也張邦昌入城僭皇帝位國號大楚金人責金銀愈峻而民間取之盡矣邦昌致書懇免金人退師邦昌遣使請康王早正大位於是康王即位於南京臣稱曰女真以蒙古部落崛起海陬乘天祚暴昏謀殞厥祀是時中國承平日久大臣喜開邊事首納良嗣之叛以圖燕壤之復又聽張覺之歸以啟敵人之釁自是中國弱而敵國彊矣然背棄盟好侵我畿甸邀索金幣

濟其貪婪於斯時也國何以支而民何以堪乎以此言之中國武備蓋不可一日而忘也

東都事略卷一百二十六

欽定四庫全書

東都事略卷一百二十七 宋王稱撰

附錄五

李彛興夏州人也本姓拓拔唐末有思恭者鎮夏州討黃巢有功賜姓李氏世有夏銀綏宥靜五州之地思恭卒其弟思諫為節度使思諫卒軍中立其子彛昌彛昌為其將高宗益所殺而仁福立不知於思諫為親疎也仁福封朔方王卒子彛超立彛超卒弟彛興立彛興當

五代之際為中書令封西平王周世宗時加太保恭帝
加太傅宋興加太尉太原劉承鈞誘代北諸部來寇麟
州彞興遣將禦之承鈞去彞興貢戰馬太祖命玉工琢
帶賜之問其使腰圍大小使言彞興腰圍洪大如合抱
之木太祖曰汝帥真福人也卒追封夏王子克儼立即
以為定難軍節度使卒贈侍中子繼筠立太宗征太原
繼筠遣將度河掠寇境以張軍勢踰年而卒弟繼捧立
繼捧初為牙內指揮使嗣繼筠為留後太平興國七年

來朝以夏銀綏宥靜五州之地來歸太宗嘉之繼捧願
留京師太宗遣使詣夏州護繼捧親屬赴闕以繼捧為
彰德軍節度使徙鎮崇信又徙感德初繼捧之來朝也
其弟繼遷留居銀州時年十七乃率衆為寇奔入蕃族
地斤澤以叛都巡檢曹光實選精騎夜發掩襲地斤繼
遷遁去獲其母妻繼遷因詐降誘殺光實時朝廷屢發
兵討繼遷繼遷益侵擾邊境太宗用宰相趙普之策欲
委繼捧以邊事令圖之召赴京師賜姓趙氏名保忠以

為定難軍節度使賜予甚厚保忠至鎮即言繼遷悔過
歸款太宗以繼遷為銀州刺史然繼遷寔無降心復為
寇保忠來乞師太宗遣翟守素討之繼遷皇懼奉表歸
順以為銀州觀察使賜姓名趙保吉又以其弟繼忠為
綏州團練使賜姓名曰趙保寧是歲保忠遣使來獻海
東青太宗曰朕不事畋遊也還之保忠為保吉所誘陰
與之合來寇靈州太宗命李繼隆討之保忠上言已與
保吉解仇貢馬五十匹乞罷兵太宗怒督繼隆進軍及

王師壓境保忠反為保吉所圖欲併其衆縛牙校趙光祚襲其將保忠方寢聞難作單衣被髮騎駿馬遁僅以身免資財器用悉為保吉所奪保忠夜還城中為大校趙光嗣幽於別所明旦開門迎王師繼隆擒保忠以獻太宗赦其罪以為右千牛衛上將軍封宥罪侯後數年而卒太宗下詔隴夏州居民並遷於綏銀等州削保吉所賜姓名復為李繼遷繼遷遣牙校以良馬來貢且謝過又上表待罪因言違叛事出保忠願赦勿誅太宗遣

內侍齋詔諭之賜以器幣繼遷遣親校張浦以良馬橐駝來貢太宗遣使齋詔諭旨欲授以鄜州節度使繼遷不奉詔太宗以張浦繼遷謀主也留之京師以為鄭州團練使初朝廷欲城古原州而陝西轉運使鄭文寶固請築清遠清遠在旱海中不毛之土素無井泉陝右之民甚苦其役文寶建議禁烏白池青鹽以困繼遷而戎人益以叛俄弛其禁繼遷寇清遠軍命白守榮馬紹忠護送芻粟四十萬於靈州為繼遷所邀敗於洛浦河繼

遷遂窺靈州太宗怒復命李繼隆出環州凡五路出兵
抵平夏繼隆出師行數日不見賊引軍還而諸將與賊
烏白池大小數十戰繼遷遁去太宗崩繼遷乃遣使脩
貢求領藩任真宗許之復賜以姓名拜定難軍節度使
敕諸將勿加兵以其子德明為行軍司馬未幾復寇邊
屢為六谷都首領潘羅支所擊又寇清遠軍七日而陷
又陷靈州繼遷率衆入西涼府潘羅支偽降繼遷繼遷
受之不疑景德元年羅支遽集六谷蕃部及者龍族合

擊之繼遷中流矢至靈州三十里而死德明遣使來貢
明年上表歸款且言保吉臨終祝之曰爾當傾心內屬
如未許則連表祈請真宗嘉之以德明為定難軍節度
使封西平王終其身三十餘年不敢窺邊德明累遷至
太傅封夏王其子元昊性兇鷙多猜忌曉浮圖學通漢
文字既長數勸德明反德明曰國中三十年不被皮毛
而衣錦綺之衣汝無負天子也吾嘗從事於兵勞苦萬
狀第自困爾德明嘗攻陷甘州拔西涼府德明死元昊

襲定難軍節度使封西平王元昊避其父名乃以明道
為顯道稱於國中景祐元年寇環慶路殺掠居民下詔
約束之是歲偽改年為開運更曰廣運母米氏族人山
喜謀殺元昊事覺元昊殺其母而山喜之族皆沈於河
遣使來告哀元昊攻唃廝囉陷瓜沙肅三州盡得河西
之地將謀叛恐唃廝囉制其後復舉兵攻蘭州又改元
曰大慶寶元元年元昊反以十月十一日築壇受冊僭
號始文英武興法建禮仁孝皇帝國稱大夏改元曰天

授禮法延祚明年遣使來告即位詔削奪元昊在身官
爵除屬籍有能執元昊來獻者授定難軍節度使元昊
又遣人齎嫚書納旌節康定元年寇金明砦執李士彬
攻安遠砦遂攻延州劉平石元孫來援戰於三川口陷
賊中未幾寇鎮戎軍慶曆元年寇渭州任福戰敗於好
水川轉寇河東陷豐州二年遣前所執塞門砦主高延
德求通和范仲淹為書以禍福諭之曰國家景德初河
西休兵之後中外上言靈夏數州本為內地請移河朔

之兵益關中之力以圖收復真宗皇帝以文武之德柔
遠先大王歸向朝廷心同金石故待先大王以骨肉之
親命為同姓全付大夏真宗皇帝於是時也有天地之
造焉今大王青春襲爵不知真宗皇帝有天地之造違
先君之誓書不避本朝並建大位累遣使人告於朝廷
中外之人莫不驚憤咸欲收行人戮於都市皇帝詔曰
非不能以四海之力支其一方念先帝歲寒之本意故
夏王忠順之功豈以一朝之失而驟絕之皆不戮而還

假有諸蕃之長抗禮於大王而能含容之若此乎省初
念終天子何負於大王哉天子遣仲淹經度西事面諭
之曰有征無戰不殺非辜王者之兵也仲淹敢不夙夜
於懷至邊之日見諸將帥多務小功不為大略甚未副
天子之意仲淹與太王同事朝廷於天子則父母也於
大王則兄弟也豈有孝於父母不愛於兄弟哉可不為
大王一一而陳之名不正則言不順言不順則事不成
大王世居西土衣冠言語當從本國風俗何得與天子

倖儼名豈正而言豈順哉徒使瘡痍百姓傷天地之仁
仲淹每念有征無戰不殺非辜之訓夙夜於懷方欲與
大王議而決之重人命也今大王遣人遠來惠然留意
何樂如之但議論未順文字未止不敢聞於朝廷大王
果能以愛民為意言當時之事由於衆請莫過於此謝
於朝廷朝廷必當復其王爵承先大王保國庇民之志
天下孰不稱大王賢哉如衆多之情終不獲辭則漢唐
故事如單于可汗之稱尚有可稽又於本國言語為便

亦不失其貴矣貢奉上國存中外之體不召天下之怨
不困天下之民使邊蕃之人復見大康又大王之國財
用或闕朝廷每歲必有物帛之厚賜為大王助也大王
幸聽之則上下同其美利邊民之患息矣其若不聽他
日雖有請於朝廷必有噬臍之悔仲淹今日之言不獨
利於大王蓋以奉君親之訓救生民之患合天地之仁
而已唯大王擇焉元昊使其親信野利旺榮復書而嫚
辭如故龐籍言諸路皆傳元昊為西蕃所敗又野利族

內叛黃鼠食稼天大旱其國內既多憂虞必為納款之計遂令保安軍檄野利旺榮且言旺榮方總靈夏之兵儻陰圖內附即當以西平茅土分策之种世衡亦遣王嵩以棗及畫龜遺之諭以早歸之意旺榮遣其教練使李文貴至青潤籍疑其詐留之後數月果大舉而葛懷敏死於定川籍召文貴責以大義而釋遣之文貴去逾月復來旺榮與弟旺令嵬名壞卧譽諍三人列名為書欲議罷兵然未肯削去僭號且云如日之方中止可順

天西安可逆天東籍以其言未可屈服乃報之此非邊臣所議宜遣人自請朝廷明年遣其臣賀從勗與文貴俱來稱男邦兒定國兀卒上書父大宋皇帝更名曩霄籍以父子亦無不稱臣之禮今名體未正未可許遣邵良佐等更往議之四年曩霄遣使來稱臣稟正朔遂冊為夏國王改所賜敕書為詔而不名聽自置官屬使至京師許就驛貿易燕坐朶殿朝廷遣使至其國相見賓客禮置榷場於保安軍及高平砦博易用牛羊馬駝氈

褐禁青鹽生屬戶蕃部更不得相侵犯歲賜絹銀茶綵
共二十五萬五千如欲於界上承所賜亦聽自後復脩
貢職為常初元昊之叛也朝廷命夏竦范雍經度邊事
後以范仲淹韓琦經略而元昊臣其年契丹夾山部落
保家族八百戶投之契丹宗真使人追索曩霄留不遣
宗真遂親將至境上各据一山嚴兵相待曩霄奉卮酒
為壽大合樂仍折箭為誓及罷契丹劫曩霄曩霄覺以
兵拒之大敗契丹宗真領數騎東走縱其去曩霄用兵

多詭計其左右任事之臣有疑輒誅殺之盡更先世所為居室衣冠文字而國中數有叛者曩霄有兵十五萬八千五百人得中國無藝者使耕於河曩霄凡七娶一曰母米氏二曰索氏三曰都羅氏四曰咩迷氏五曰野利氏野利遇乞妹也生三子次曰甯寧哥貌類曩霄以為太子曩霄復納沒咩氏女野利之族有怨語曩霄遂殺野利遇乞等三家既而野利氏訴言我兄弟無罪見殺曩霄憐之下令國中為訪其族人得遇乞妻沒藏氏

與之私通野利氏覺之乃出遇乞妻為尼號沒藏大師
生諒祚六曰耶律氏七曰沒咻氏初欲納為寧寧哥妻
曩霄見其媼而自取之號新皇后寧寧哥憤而殺曩霄
不死剽其鼻而去匿黃廬為訛厖所殺訛厖沒藏氏之
兄也曩霄遂因剽創死年四十六方沒藏氏出為尼也
既娠而曩霄死遺言立其從弟委哥寧令訛厖以夏有
國以來父死子繼委哥寧令非子而沒藏尼有娠幸而
有子足以為嗣後二月而生諒祚遂立之以沒藏氏為

太后於是政在沒藏矣

東都事略卷一百二十七

欽定四庫全書

東都事略卷一百二十八 宋王稱撰

附錄六

諒祚既立而幼弱國中大亂有欲勸仁宗舉兵以收復
靈夏者仁宗曰朕為天下主豈可利人之喪舉兵快意
乎遂冊諒祚為夏國主其後訛虜自以女妻諒祚有李
守貴者嘗與遇乞掌出納寶保細吃多已者嘗侍曩霄
及沒藏尼於佛舍故出入無所問沒藏尼既通守貴又

通吃多已李守貴殺吃多已及沒藏尼訛厖乃族守貴
獨護養諒祚訛厖子婦梁氏諒祚私焉訛厖患之梁氏
密告訛厖將叛諒祚乃舉兵誅訛厖滅其族并殺其妻
沒藏氏而以梁氏為妻命其弟乞埋為家相諒祚凶忍
好為亂時過酋豪大家輒私其婦女故下多怨及變蕃
禮從漢制嘉祐六年諒祚上書自言慕中國衣冠明年
當以迎漢使者仁宗許之治平三年舉兵犯慶州又寇
大順城諒祚乘駱馬張黃屋自出督戰為官兵與熟戶

蕃官趙明合擊之諒祚中流矢兵折而去朝廷遣使詰責之諒祚上表謝罪明年种諤取綏州城之諒祚偽乞會盟誘殺知保安軍楊定而朝廷命韓琦知永興軍經略西方而諒祚乃送殺定者李崇貴韓道喜以獻納塞門安遠砦乞綏州洎遣使分畫乃曰地界非納而所納者砦也朝廷知其詐遂城綏州為綏德城崇貴等未至而諒祚死子秉常立神宗冊為夏國主熙寧三年來犯慶州又犯大順王師不利命韓絳宣撫陝西絳城囉兀

築撫寧堡夏人乃陷撫寧急攻囉兀絳等命諸路牽制
慶兵再出而亂乃棄囉兀撫寧元豐四年种諤言秉常
被殺乞興師問罪又謀言母梁氏屢勸秉常不行漢禮
秉常不從有李將軍者為秉常誘漢倡婦樂人梁氏置
酒執李將軍殺之囚秉常國人乖亂事聞詔興師問罪
遣种諤出廊延劉昌祚出涇原高遵裕出環慶李憲出
熙河王中正出河東五路會於興靈夏人悉其精銳度
河保興靈昌祚之師先至靈州城下多所斬獲遂攻靈

州城垂克而遵裕之師至先是詔先得靈州者除節度使而涇原之師入界聽遵裕節制遵裕忌昌祚將斬之命涇原師毋得擅攻而夏人得以為計城不可下遂班師中正入宥州憲追襲過天都山至囉逋山乃還取蘭州城之皆不至興靈种諤以廊延之師城細腰吳堡義合塞門米脂五砦河東城葭蘆吳堡二砦种諤復建言盡城橫山遣徐禧計議禧請城永樂夏人來攻城陷徐禧李稷李舜舉死之乃築汝遮堡展定西城以衛蘭州

六年來請和許之七年舉國圍蘭州詔邊吏用淺攻獲耕耨常遣使入貢乞還土疆不許神宗崩哲宗即位遣使謝罪來賀登寶位又以地界遣泛使至京師秉常卒子乾順立元祐二年遣劉奉世崔象先冊乾順夏人復以地界為詞不復入謝且犯涇原鎮戎軍又侵德靖砦又犯塞門砦四年乃復遣使謝封冊且議地界朝廷許還葭蘆米脂浮圖安疆四砦仍先以歲賜予之是歲以永樂陷沒人口來歸却欲同日交領四砦詔廊延帥趙

禹與夏人分畫地界熙河帥范育請先畫疆界後歸四
砦議未定而四砦棄禹又乞地界依綏州故例於城之
外取二十里仍半以為生地夏人不從遂犯涇原會禹
卒夏人由河東入寇攻圍麟府州朝廷乃議絕歲賜禁
和市使沿邊諸路為淺攻計命熙河進築定遠城夏人
不能爭未幾復寇環慶使熙河進築汝遮城八年乾順
遣使謝罪獻蘭州乞賜塞門砦詔荅以夏人自元祐通
貢受賜後來累次犯邊仍候諸路地界了日可依例別

進誓表然後常貢歲賜並依舊宣仁后崩乾順進奉山陵馬一百匹紹聖二年詔熙河蘭岷廊延河東路地界令諸路沿邊當職官司更不商量分畫只以巡綽卓望處守把牒報夏國先是元祐初諫議大夫孫覺議棄蘭州其後司馬光謂此數砦者田非肥良不可以耕墾地非險要不可以守禦欲因天子繼統悉皆毀撤歸其侵地劉摯謂供給戍守窮竭財力其最大者莫如蘭州不若捐一空城與之至於廊延河東等路近置堡砦深詔

大臣早有定計趙禹欲留塞門安遠二砦其餘或存或廢乞密降畫一付臣遵守呂陶謂實於邊防無分毫之益范純粹謂收復故砦廢州略無所利乞令以虜陷官吏丁夫悉歸朝廷而所削之地並從給賜純仁之論亦然蘇轍謂增置州砦坐困中國願決計棄之王存謂夏國疆地終久難守王巖叟謂自有葭蘆吳堡兩砦守之無所得棄之不足惜文彥博謂邊臣欺罔為國生事第恐不能持久却須自棄不若推恩賜予遂降詔除元係

中國及西蕃舊地外候送到陷沒人口當就委邊臣分畫給賜及夏人送還永樂陷沒人口尋給賜米脂安疆浮圖葭蘆四砦仍約以委官畫定界至至是章惇為相欲開邊隙以謂十年之間含容備至而夏人犯邊如初遂罷分畫之議夏人遂犯義合砦及圍逼塞門砦又犯德靖順寧砦章惇以涇原及熙河環慶秦鳳四路之師出瓠蘆河築二城於石門砦夏人來乘我師大敗之既而環慶廊延河東熙河皆築城夏人睥視不敢動惇又

以折可適郭成之師大敗之於雞靶嶺呂惠卿以其將
劉安苗履大破之於大沙堆既又乾順與其母自將數
萬圍新築平夏城凡十四日晝夜攻城守益堅乃造高
車以臨城載數百人填壕而進俄大風震折之一夕遁
去折可適執其統軍嵬名阿埋監軍妹勒都逋進築西
安城於天都山建西安州諸路進築悉已畢工乾順上
表歸順崇寧三年復寇涇原我師取其銀州五年乾順
納款大觀間環慶蕃將李遇昌及其父訛移叛歸其國

漸用事引夏人入寇徽宗因遣童貫為陝西經略制置使貫出討溪哥臧征僕哥城復積石軍洮州政和初夏人又深入過定邊軍築城佛谷口名洪夏軍貫以种師道之師平之夏人來救又敗之遂破臧底河成德軍七年夏人圍丁星原築平陽瞎令古仁多泉及靖夏制戎伏羌等城重和元年貫出師收割牛城王師敗績大將劉法戰沒貫以种師道劉仲武劉延慶將兵至蕭關取永和砦割踏砦鳴沙會大敗夏人而還初夏國恃橫山

諸族帳彊勁善戰故用以抗中國种諤謀取橫山故興
靈州之師及王師失利李憲始獻進築之議神宗厭兵
不克行童貫舊常從李憲得其彷彿故獻議進築遂領
六路邊事將諸路兵六七年進築軍壘建立堡砦遂得
橫山之地夏人失所恃遂納款夏國自是少衰矣宣和
中夏人知中國有事北邊遂與遼國書約夾攻中國天
祚不聽金人既滅遼夏人乃與尼堪約犯塞尼堪犯忻
代踰石嶺闖圍太原夏人犯豐麟二州靖康元年夏人

知我戍邊士卒入援遂乘虛犯河外寇震威城朱昭死
之又取西安州陷懷德軍劉銓杜翊世以城死

臣稱曰自繼遷死德明款塞西鄙息肩矣元昊強梁兇
悍乃謀僭尊以天下之力而臨區區之一方然未嘗少
挫其鋒及其敗於女色禍發其子且彼能叛君而子亦
能弑父此天道也烏虜夏小國也自元昊以來服叛不
常而每為中國之患雖有智者為之謀而亦莫能以得
志何哉大氏國大則有所恃而不戒故其彊易弱國小

則無所恃而常懼軍民之勢猶一家也相卹相救謀慮
日深故其弱為難犯此其所以為中國之患與

東都事略卷一百二十八

欽定四庫全書

東都事略卷一百二十九 宋王稱撰

附錄七

西蕃蓋出南涼禿髮利鹿孤之後在唐為吐蕃安史之亂遂陷河西隴右之地大中三年其國宰相論恐熱以秦原安樂及石門等七關來歸四年克城維扶三州五年張義潮以瓜沙伊肅十一州來獻唐末瓜沙之地復為所隔然其國亦自衰弱族種分散無復統一方五代

之際有孫超者一嘗遣人入貢唐明宗以為河西軍留
後超死州人推其土人折蒲嘉施繼為留後至周太祖
始命申師厚為河西節度使顯德中師厚不能撫有其
衆逃歸涼州自是不復命帥建隆中首領尚波于傷殺
秦州乘造務卒知秦州高防捕繫其黨四十七人以狀
聞太祖乃以吳廷祚為雄武軍節度使代防安輯之廷
祚至宣朝廷恩旨俾各歸本族尚波于感悅是年秋來
獻伏羌地太平興國中諸羌首領數來朝貢亦數盜邊

至八年諸種以馬來獻太宗謂宰相曰吐蕃言語不通衣服異制朕常以禽獸蓄之自唐以來頗為邊患以國家兵力雄盛聊興偏師便可驅之數千里外但念其種類蕃息安土重遷儻因攘除必致殺戮朕所以置於度外存而勿論也淳化中西涼州阿喻丹來貢阿喻丹死其弟俞龍波代其任數為李繼遷所侵掠俞龍波來請師咸平四年西涼府六谷都首領潘羅支願戮力討繼遷張齊賢請封羅支為六谷王兼招討使真宗曰羅支

已為西帥欲授以刺史則太輕況未領節制加以王爵
非順也又招討使號不可假外夷乃以為鹽州防禦使
兼靈州西面都巡檢使羅支請師期又遣使來言感朝
廷恩信憤繼遷倔彊已集兵六萬乞會王師收復靈州
乃以羅支為朔方軍節度使羅支屢請王師助擊賊議
者以西涼去渭州河路遠不可豫約師期真宗曰繼遷
常在地斤三山之東每來寇邊及官軍至則已遁去使
六谷部族近塞禦之與官軍合勢亦國家之利也許之

是歲繼遷攻西蕃遂入西涼府羅支偽降未幾集六谷諸豪及者龍族合擊繼遷繼遷中流矢死既而繼遷種落陰圖羅支遂為其所殺六谷諸豪議立其弟廝鐸督為首領真宗以繼遷之黨未平遂以廝鐸督為朔方軍節度使西涼府六谷大首領於時西羌部族未有服屬大姓聳昌廝均等迎喃廝囉至河州欲立文法於是宗哥立遵與邈川溫逋奇佐喃廝囉立文法部族稍歸之大中祥符七年因徙居宗哥城以立遵為輔有勝兵六

萬以抗德明曹瑋請序結之真宗以瑋知秦州瑋破魚
角蟬賞樣丹二族皆立遵鄉道也由是前拒王師者伏
匿避罪瑋誘召之許納罰首過既而至者數千人納馬
六十匹瑋給以匹綵或以少為訴者瑋叱之曰是贖罪
物汝輩敢希利耶我族間之皆畏服立遵佐唃廝囉其
有威名然性貪忍下多怨之屢上表求贊普真宗曰贊
普者戎王之號也立遵為唃廝囉佐其可與乎乃與廝
鐸督例授以保順軍節度使唃廝囉命立遵率衆十八

萬襲秦州生熟戶曹瑋以兵擊之遂居邈川更以溫逋
奇為輔遣使于瑋求內屬詔授唃廝囉邈川首領寧遠
大將軍受州團練使以溫逋奇為歸化將軍後溫逋奇
謀亂唃廝囉殺之而改莅青唐景祐中授兩使留後唃
廝囉與元昊交兵使人來獻捷仁宗召見而勞之大臣
議加唃廝囉節度使韓億以為不可語在億傳久之朝
廷以元昊不臣遣使喻唃廝囉使攻元昊會元昊舉兵
襲唃廝囉堅壁不與戰元昊度水嘗植幟以誌深淺唃

厮囉潛使移所植及元昊衆潰趨誌處溺死過半自是數以計敗元昊元昊取西涼府而喃厮囉併厮鐸督之衆十餘萬回紇亦以數萬歸焉其勢遂彊於諸羌朝廷命為保順河西節度使洮涼兩州刺史治平二年卒年六十九三子皆被恩命曰瞎孛居合龍谷曰磨孛角居宗哥城曰董孛為喃厮囉嗣朝廷以董孛為保順軍節度使西蕃邈川首領初嘉祐中瞎孛子瞎欺丁未征為瞎藥雞羅所誘据近塞青唐族立文法朝廷以為河州

刺史熙寧中王韶經營熙河既城熙州木征竄伏河外
韶遣僧智緣說木征啗以厚利因以兵往韶又數出兵
擾之所殺獲前後數千級焚燒帳族以萬數納降大首
領十餘皆其腹心也又擒其妻子而木征降盡復洮河
地方二千里自韶用師熙河歲費四百萬緡於是木征
賜姓名曰趙思忠授榮州團練使遷合州防禦使以卒
董氈遣使來以為河州刺史神宗出師問罪夏國董氈
集六部族兵十二萬分三路與漢軍會明年拜河西軍

節度使封武威郡王以其養子阿里骨為肅州團練使董環病革召諸族首領至青唐城謂曰吾一子已死惟阿里骨母掌牟瞎逋事我當以種落付阿里骨諸酋皆服從既死阿里骨遂居青唐領事元祐元年以為河西軍節度使西蕃邈川首領阿里骨性殘忍以殺戮為事詔戒飭之曰爾繼世之初人情未一宜推廣恩信惠養一方今間爾頗峻刑殺部族不寧爾宜以繼承為重以仁厚為先無恃寵榮務安種落副朝廷所以封立之意思

前人所以付予之心二年阿里骨迫鬼章率衆竊據洮州殺虜人畜羌酋結藥密使所部怯陵來告阿里骨遣人執怯陵結藥恐事覺以其妻子來歸又進築安鄉踏白城我師問罪及令撫納生羌鬼章就擒鬼章者大酋也桀黠有智謀所部兵銳數為邊患熙寧中誘陷河州景思立神宗屢詔王韶欲生致之至是與夏人解仇為援築洮州居之劉舜卿遣种誼破其城生擒之以為陪戎校尉後三年而死阿里骨請歸款朝廷許之復下詔

戒飭曰惟爾祖先世篤忠孝本與夏賊日尋干戈亦惟恃我朝廷爵秩之隆用能保爾子孫黎民之衆肆朕命爾嗣長乃師而承襲以來彊酋外擅爾弗能禁恣其所為遂據洮城以犯王略陰連夏賊約日盜邊朕愍屬羌之無辜出偏師而問罪元惡俘獲餘黨散亡山後底平河南綏服朕惟率酋豪而捍疆場乃爾世功叛君父而從仇讎豈其本意庶能改過未忍加兵果因物以貢誠願洗心而效順爾既知悔朕復何求已指揮熙河路更

不出兵及除已招納到部族外住罷招納依舊許般次
往來買賣及上京進奉爾宜約束種類共保邊陲期寵
祿之有終知大恩之難再勿使來款復為虛言紹聖三
年卒年五十七以其子瞎征承襲即以為河西軍節度
使西蕃邈川首領瞎征既立國人不順迎董氈妹溪巴
溫欲復其國姓既而國亂首領多歸溪巴溫邊臣以聞
朝廷命王瞻招納瞎征遂削髮為僧出降而溪巴溫之
子隴拶乘間入青唐稱王子邊臣欲因有其地乃度河

據邈川城以重兵臨之故隴拶亦出降朝廷以青唐為鄯州邈川為湟州徽宗即位以隴拶為河西軍節度使知府州折氏世襲鄯州瞎征授懷遠軍節度使賜隴拶姓名曰趙懷德瞎征後一年而死建中靖國元年以懷德知湟州自鄯湟棄羌人迎隴拶之弟溪賒羅撒復國授西平軍節度使西蕃邈川首領懷德還邈川溪賒羅撒與其黨謀掩殺之懷德遂奔河南朝廷遣王厚童貫將兵至京玉關議招降厚等進至湟州三日拔之崇寧

三年厚與諸將將兵會於宗哥川溪賒羅撒置陳倚北
山厚與戰敗之溪賒羅撒以一騎馳去厚至鄯州其酋
領開門以降詔更鄯州為西寧州趙懷德亦遣使約降
四年懷德至京師徽宗御端門受降以懷德為感德軍
節度使安化郡王至靖康初朝廷議欲求青唐種族以
湟鄯之地賜之事下熙河帥臣而莫敢任其責者乃已
及金人陷陝西六路兵入熙河帥求湟鄯舊族以其地
與之

臣稱曰天下有道則薄海內外皆安其所自韶開熙河
厚取湟鄯而道路困於輸送兵民死於血刃者蓋莫知
其紀極矣且邊徼荒服也空虛不毛之地得之何所用
乎烏虜造釁而興師貪功而好殺後之君子可不以是
為戒哉

東都事略卷一百二十九

欽定四庫全書

東都事略卷一百三十 宋王稱撰

附錄八

交趾本南粵之地漢武帝平南粵分其地為儋耳朱厓南海蒼梧鬱林合浦交趾九真日南凡九郡置交趾刺史以領之後漢置交州晉宋齊因之又為交趾郡梁陳亦因之隋平陳廢郡置州煬帝廢州為郡唐改交州總管又改安南都護五代之際有曲承美者以土豪專有

其地劉龔遣將伐而執之并其地後有楊延藝受劉氏爵命延藝為其牙將皎公美所殺延藝故將吳權攻交州殺公美遂居其地權死子昌岌立昌岌死其弟昌濬立昌濬死牙將爭立境內大亂初楊延藝以牙將丁公著攝驩州刺史部領即其子也公著死部領繼之部領與其子璉率兵平境內部民推以為帥號曰大勝王以其子璉為節度使凡三年璉襲父任太祖既下嶺南璉遣使內附授靜海軍節度使安南都護開寶八年封部

領為交趾郡王太平興國初部領及璉皆死弟璿尚幼大將黎完幽丁氏宗族代摠其衆太宗怒以蘭州團練使孫全興八作使張濬左監門衛將軍崔亮將兵伐之黎完為丁璿表求襲兄位不報是時王師大破交趾兵斬首萬級又破其兵於白藤江口轉運使侯仁寶帥前軍先進為交趾所殺遂班師孫全興亦坐誅丁璿遣使謝罪八年黎完廢丁璿自稱交州三使留後遣使請命太宗因而撫之喻以丁氏傳襲三世朕欲令璿為統帥

以爾副之若璿將材無取猶有童心則宜遣其母子及親屬來歸俟其入朝却授爾以節旄凡茲二途爾宜審處其一是時黎完已專據其地不聽命雍熙中上表求正領節鎮太宗因授以靜海軍節度使南安都護遣其子明提入貢景德二年卒子龍鉞立其弟龍延殺之自立於是諸子爭立境內大亂羣臣多請伐之真宗曰未加弔恤而伐其喪豈王者所為命邊臣撫安之公海安撫使邵晔上邕州至交州水陸圖真宗曰祖宗開疆如

此其大守之而已安用勞民以貪無用之土乎若封略之內有叛者則不得不除耳未幾龍延上表請命又遣其弟明昶來遂授以靜海軍節度使賜名至忠至忠苦虐其大校李公蘊常陰贊之故特見親信因令冒姓黎氏大中祥符二年至忠卒弟明提明昶爭立公蘊發兵皆擊殺之自稱留後請命於朝真宗曰初黎完劫丁璿自立公蘊亦爾然蠻夷豈足以禮義責也遂授公蘊靜海軍節度使安南都護封交趾郡王公蘊因捕狄獠寇

如洪皓詔追所掠生口因戒飭之天禧元年封南平王
天聖中令其子弟率衆入寇詔發峒丁討捕未幾而卒
年四十四子德政自稱留後來告哀除靜海軍節度使
安南都護交趾郡王景祐三年寇邕州之恩陵等州及
諸峒略牛馬焚室廬而去詔責問令捕酋領正其罪實
元元年進南平王儂智高反率兵二萬助王師平智高
詔却其兵而厚賜之久之卒子日尊遣使來告哀即除
靜海軍節度使安南都護交趾郡王嘉祐三年來貢異

獸曰麟也樞密使田況曰非麟也止云異獸謝答之英
宗即位加同平章事神宗即位進南平王加開府儀同
三司襲位十八年而卒子乾德嗣朝廷命以靜海軍節
度使安南都護交趾郡王沈起知桂州妄意朝廷有攻
取之議不能懷輯乃以溪峒黠集土丁又禁交趾與州
縣貿易於是交趾貳遂謀入寇熙寧八年乾德大舉兵
連陷欽廉二州遂圍邕州知邕州蘇緘日夜勞苦士卒
禦敵前後射殺萬五千餘人城中人心益固而救不至

被圍四十二日而城陷絨死之三州死者無慮十餘萬人神宗以趙鼎為招討使總九將軍進討既又以郭達為宣州使而高副之達至長沙督諸道進兵復邕州達遣將拔永安州於是溪峒悉降達次思明州遣燕達討廣源州降其觀察使劉紀師次富良江交趾承船迎戰達破之獲賊將洪真太子賊勢蹙乾德乃奉表乞降是時王安石與吳充以交趾事爭上前安石以為可取充曰得之無益至是乾德歸順神宗許之哲宗即位加同

平章事元祐中進南平王乾德歷哲宗徽宗兩朝未嘗
犯順宣和元年加守司空至靖康初乾德尚無恙後二
年乃死楊換立

臣稱曰自公蘊以來中國所以懷柔者恩意備至故得
蛙藏井底蟻聚穴中焉然黎全劫丁璿再傳而遽亡公
蘊寡提昶數世而未殞豈非其幸與

東都事略卷一百三十